

Hven, [nicht nach 15. August] 1579

Von Tycho Brahe

Abschrift: ÖNB Wien, Cod. 10686<sup>66</sup>, fol. 70<sup>r</sup>-71<sup>r</sup>.Druck: Brahe, *Epistolae S. 48-50; Brahe, Opera omnia, Bd. 7, S. 52f.*Übersetzung: Keil/Zäh, *Aufenthalt S. 92-94; Keil/Zäh, Beziehungen S. 188-190.*

## TYCHO BRAHE AD HIERONYMUM WOLFIUM.

S. REDDITAE mihi sunt literae tuae, doctissime et amantissime Domine WOLFI, quas circa finem Martij huius anni ad me dedisti, quae non minimum mihi attulerunt voluptatem, quod ex ijs te pro ea aetatis et consuetae valetudinis invalida ratione salvum et incolumen esse intelligerem. Scripta vero eorum, qui de Cometa aliquid in Germania publicarunt, quae tunc temporis a WILLERO tam cito habere non potuisti, a Domino PAULO HAINZELIO recepi, in quibus prae caeteris placet MAESTLINI diligentia et proxime ad veritatem accedens observatio eique innixa Mathematica demonstratio. Nec dubito, quin is, si sumtibus ad instrumenta metallica magna et exquisita conficienda instructus esset, aliquid egregij ex observationibus in restituendis et corrigendis motibus coelestium corporum moliretur. In Apogei certe anticipatione et Excentricitatis Solis augmento, tum etiam octavae Spaerae celeriori, quam existimat COPERNICUS, promotione, quantum ex ijs, quae HAINZELIUS communicavit, percipio, a nostris inventis proximeque elapsis, aliquot annis sedulo factis observationibus non multum discrepat, ut latius ad Dominum HAINZELIUM perscripsi. Ephemerides eius, vel si quae alia ab ipso publicata sunt, ad me transmittas velim. Et, si is aliqua familiaritate tibi coniunctus est, ipsum esti mihi ignotum meo nomine salutes quaeso et ab ipso impetres, ut per occasionem mihi scribat, suasque observationes, si quas habet exactiores, mecum (si ita libuerit) communicet: ego vicissim idem ipsi praestiturus sum et ipsius conatus, quacunque ratione licuerit, promovere studebo. Si vero interea aliquot Scripta de Cometa illo adeptus es praeter ea, quae ad me misit Dn. HAINZELIUS, peto ut mihi illa, qualiacunque sint, transmittere non graveris. Ego propter varias occupationes tam Regis, quam amicorum nomine incidentes, in primis vero propter aedificationem et oeconomiae novae instituendae molestias, quibus implicor, ea quae de hoc Cometa concepi, et quae ex observationibus certis demonstrare satago, nondum absolvere potui. Spero tamen per otium hybernum, Deo volente, me id effecturum, ubi et alia quaedam, quae Astronomiae erratis corrigendis opportuna sunt, elaborare animus est. Huic enim studio vacare inter plurimas alias occupationes non intermittam, et instrumenta huic negotio idonea partim parata habeo, partim indies parari curo, quae et magnitudine et habilitate et diligenti elaboratione mechanicae veterum et recentiorum Astronomiae tractationi, sumtu magno, labore diurno, confectione exquisita minime cessura confido. Aedificationis vero nostrae structuram ita adornavi, ut his utendis sideribusque commode in ea observandis quam maxime competit. Eam enim ob causam in hanc Insulam secessi, ut Philosophiae et Astronomicis exercitijs libere operam navare possim; et quanquam praeteritis proxime annis ob aedificationum molestias nonnihil in his strenue exequendis impeditus fuerim, tamen spero, me in posterum (si Deus vitam et vires suppeditaverit) maiori commoditate, quam interea paro, id recompensaturum. Haec ad te perscribere hoc tempore placuit, ne hic doctissimus vir M. ANDREAS SEVERINI mihi familiaritate iunctus ad te pari ratione mihi devinctum sine nostris literis veniret. Is enim, cum se causa lustrandi quasdam in Germania Bibliothecas per aliquod tempus discurrere velle proposuisset, Augustam etiam ad vos se abiturum aiebat. Peto itaque, ut si qua in re ipsius desideria promovere possis, efficias, ut sentiat, te non solum TYCHONIS, sed eius insuper

amici amicum esse. Bene vale carissime WOLFI, et quavis data occasione mihi scribere et quod saltem licet, calamo et charta gratam amicitiae nostrae memoriam conservare ne intermittas; ego vicissim nullam occasionem frustra praeterlabi sinam, quin intelligas, me tui perpetuo amantissimum permanere. Iterum quam felicissime et diutissime vale, mi carissime WOLFI. Datae in Insula nostra Huaena 1579.

T[uus]  
TYCHO BRAHE.